



جياتن كذاكيمن شرعية هليسيا
JABATAN KEHAKIMAN SYARIAH MALAYSIA (JKSM)

**Y.A.A. Ketua-Ketua Hakim Syarie,
Jabatan Kehakiman Syariah / Mahkamah Syariah,
Negeri-Negeri Seluruh Malaysia**

**SURAT PEKELILING KETUA PENGARAH / KETUA HAKIM SYARIE
JABATAN KEHAKIMAN SYARIAH MALAYSIA
BILANGAN 2 TAHUN 2004**

**PENJELASAN PELAKSANAAN
TATACARA PENYEGERAAN PENDAFTARAN KES
PENGESAHAN PERCERAIAN DI LUAR MAHKAMAH**

TUJUAN

Tujuan Surat Pekeliling Ketua Pengarah/Ketua Hakim Syarie ini adalah untuk menjelaskan tindakan yang perlu dilaksanakan oleh Mahkamah Syariah seluruh Malaysia di dalam mempercepatkan proses pendaftaran pengesahan perceraian luar Mahkamah.

LATAR BELAKANG

2. Akta / Enakmen Undang-undang Keluarga Islam Negeri-negeri memperuntukkan pengesahan perceraian luar Mahkamah hendaklah dilaksanakan seperti mana peruntukkan seksyen 55 A.

3. Peruntukan seksyen 55A (3) Akta / Enakmen Undang-Undang Keluarga Islam Negeri-Negeri menjelaskan bahawa “*Jika Mahkamah berpuas hati bahawa talaq itu telah dilafazkan dengan sah mengikut hukum syarak, Mahkamah hendaklah, tertakluk kepada*

seksyen 124, membuat perintah mengesahkan perceraian itu. Mahkamah hendaklah merekodkan perceraian itu dan menghantarkan satu salinan rekod yang diperakui kepada Pendaftar yang berkenaan dan kepada Ketua Pendaftar untuk didaftarkan.”

4. Perintah pendaftaran pengesahan perceraian luar Mahkamah yang dikeluarkan oleh kebanyakan Mahkamah Syariah Negeri-Negeri sekarang ini menyertakan *klausa* di dalam perintah suatu pernyataan “*tertakluk kepada seksyen 124*” yang membawa pengertian pendaftaran pengesahan perceraian sedemikian itu tidak boleh didaftarkan selagi sabitan pendakwaan oleh Ketua Pendakwa Syarie / Pendakwa Syarie terhadap kesalahan / penalti kes perceraian luar mahkamah belum dilaksanakan.

5. Kesan daripada kedua-dua peruntukan undang-undang tersebut itu, ramai dari kalangan Pendaftar Nikah Cerai dan Rujuk dari Jabatan Agama Islam Negeri-Negeri telah menyalahkan pihak Mahkamah Syariah bagi setiap isu kelewatan yang timbul apabila proses perceraian tidak dapat didaftarkan walaupun pada hakikatnya isu kelewatan prosiding ini bukanlah satu kelembapan proses Mahkamah Syariah kerana proses pendakwaan bagi kesalahan cerai di luar mahkamah hendaklah dimulakan daripada Bahagian Pendakwaan yang terletak di bawah bidangkuasa Jabatan Agama Islam Negeri-negeri.

6. Dalam hal ini, pandangan dari Ketua Unit Syariah Jabatan Peguam Negara dan serta Penasihat Undang-Undang JKSM telah diperolehi yang menyatakan bahawa isu sedemikian bukanlah berpunca daripada prosiding Mahkamah Syariah. Adalah tidak menjadi kesalahan kepada Mahkamah Syariah jika tidak memasukkan klausa seksyen 124 tersebut ke dalam perintah pengesahan lafaz cerai kerana pada asasnya bukanlah menjadi tanggungjawab Mahkamah Syariah bagi memastikan satu pendakwaan kesalahan dibuat atau satu penalti bagi kes perceraian luar Mahkamah dilaksanakan sebaliknya ia adalah di bawah bidangkuasa Bahagian Pendakwaan Jabatan Agama Islam Negeri. Dalam isu ini tidak sewajarnya berlaku apa-apa pertikaian bidangkuasa.

7. Sehubungan itu, sebagai langkah proaktif, Mahkamah Syariah perlulah melaksanakan peranan penambahbaikan bagi mempercepatkan proses kes pengesahan lafaz perceraian supaya tidak berterusan menjadi isu yang boleh menjejaskan kewibawaan Institusi Kehakiman Syariah di negara ini.

PELAKSANAAN

8. Oleh yang demikian, setiap perintah pendaftaran pengesahan perceraian di luar Mahkamah hendaklah diselaraskan di seluruh Mahkamah Syariah Negeri-Negeri dengan tidak menyatakan *klausa “tertakluk kepada seksyen 124”* di dalam perintah kes berkenaan seperti mana yang diamalkan sekarang. Perintah / hukuman hanya memadai dinyatakan bahawa perceraian itu adalah disahkan dan boleh didaftarkan berpandukan peruntukan Undang-undang Keluarga Islam dengan sewajarnya. Contoh perintah yang telah diseragamkan dilampirkan bersama Surat Pekeliling ini.

9. Setelah perintah kes berkenaan telah ditandatangani dan dimeterai , Ketua Pendaftar / Pendaftar , Mahkamah Syariah Negeri hendaklah mengeluarkan surat rasmi secara berasingan kepada Bahagian Pendakwaan Jabatan Agama Islam Negeri bagi menyatakan bahawa perceraian di luar Mahkamah telah berlaku untuk tindakan pihak berkenaan selanjutnya. Contoh surat makluman tersebut dilampirkan bersama Surat Pekeliling ini.

TARIKH KUATKUASA

10. Surat pekeliling ini berkuat kuasa mulai dari tarikh ia dikeluarkan.

PENUTUP

11. Y.A.A. Ketua-ketua Hakim Syarie Negeri adalah dinasihatkan untuk menghubungi Jabatan Kehakiman Syariah Malaysia sekiranya terdapat sebarang pertanyaan mengenai pelaksanaan surat Pekeliling ini.

“ BERKHIDMAT UNTUK NEGARA”

“SYARIAH ASAS Keadilan”

(DATUK SHEIKH GHAZALI BIN HAJI AB. RAHMAN)

Ketua Pengarah/ Ketua Hakim Syarie,
Jabatan Kehakiman Syariah Malaysia.

1 MAC 2004